



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ**

Ո Ր Ո Շ ՈՒ Մ

--ի 20-- թվականի N--Ա
քաղ. Երևան

**ԵՐԵՎԱՆ ՔԱՂԱՔԻ ԾԱՐԱՎ ԱՂԲՅՈՒՐԻ 55/3, 55/26, 55/33 ԵՎ 55/34
ՀԱՍՑԵՆԵՐԻ ԲԱԶՄԱԲՆԱԿԱՐԱՆ ՇԵՆՔԵՐԻ ԲՆԱԿԱՐԱՆՆԵՐԻ ԵՎ ՏԱՐԱԾՔՆԵՐԻ
ՆՈՐ ՀԱՄԱԿԱՐԳԵՐԸ ԶՐԱՄԱՏԱԿԱՐԱՐՄԱՆ ԵՎ ԶՐԱՀԵՌԱՑՄԱՆ ՀԱՄԱԿԱՐԳԻՆ
ՄԻԱՑՆԵԼՈՒ ՄԱՍԻՆ**

Հաշվի առնելով, որ՝

- ա) «Երևանի Պետական Համալսարանի շրջանավարտների միավորում» հասարակական կազմակերպությունը (այսուհետ՝ Կազմակերպություն) 2020 թվականի հունիսի 10-ի N10/006 գրությամբ դիմել է Հայաստանի Հանրապետության հանրային ծառայությունները կարգավորող հանձնաժողով (այսուհետ՝ Հանձնաժողով)՝ հայտնելով, որ Երևան քաղաքի Ծարավ Աղբյուրի 55/3, 55/26, 55/33 և 55/34 հասցեներում կառուցվել են բազմաբնակարան շենքեր (այսուհետ՝ Շենքեր), որոնց սպասարկումն իրականացնում են «Նորավան» և «Ավան-5» համատիրությունները (այսուհետ՝ Համատիրություններ): Կազմակերպության գրության համաձայն՝ Շենքերը խմելու ջրի մատակարարմամբ ապահովելու համար կառուցվել են երկու պոմպակայաններ, որոնց օրենսդրությամբ սահմանված կարգով սեփականության իրավունքով անհատույց հանձնումը Հայաստանի Հանրապետությանը տևական ժամանակ կպահանջի, և խնդրել է Հանձնաժողովի անհատական որոշմամբ թույլ տալ «Վեոլիա Զուր» փակ բաժնետիրական ընկերությանը (այսուհետ՝ Մատակարար) Շենքերի բաժանորդների հետ կնքել խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման պայմանագրեր մինչև 2021 թվականի դեկտեմբերի 31-ը գործողության ժամկետով, որի ընթացքում

պոմպակայանների սպասարկման և շահագործման հետ կապված բոլոր աշխատանքները կկատարի Կազմակերպությունը,

բ) Շենքերի նոր համակարգերի՝ Մատակարարի ջրամատակարարման և ջրահեռացման համակարգին միացման ուղղված լրացուցիչ նախագծանախահաշվային, շինմոնտաժային և այլ աշխատանքների անհրաժեշտություն չկա,

գ) Մատակարարը, Կազմակերպությունը և Համատիրությունները համապատասխան գրություններով հայտնել են, որ չեն առարկում Մատակարարի ջրամատակարարման և ջրահեռացման համակարգին միացման գործընթացը սույն որոշմամբ սահմանված ընթացակարգով իրականացնելուն,

և հիմք ընդունելով Հանձնաժողովի 2016 թվականի նոյեմբերի 30-ի №378Ն որոշման 1-ին կետով հաստատված խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման կանոնների (այսուհետ՝ Կանոններ) 23-րդ կետը՝ Հանձնաժողովը **որոշում է.**

1. Սահմանել, որ՝

1) Շենքերում բնակարանների և տարածքների ջրամատակարարումն ապահովվելու նպատակով դիմող անձանց հետ Կանոնների 22.1, 22.3 և 22.3 կետերով սահմանված ընթացակարգերով կնքվում են խմելու ջրի մատակարարման և ջրահեռացման (կեղտաջրերի մաքրման) ծառայությունների մատուցման պայմանագրեր՝ Հանձնաժողովի 2016 թվականի նոյեմբերի 30-ի №379Ն որոշմամբ սահմանված օրինակելի ձևին համապատասխան, բացառությամբ պայմանագրի գործողության ժամկետը սահմանող կետի, իսկ պայմանագրերի գործողության ժամկետ սահմանվում է մինչև 2021 թվականի դեկտեմբերի 31-ը՝ առանց երկարաձգման հնարավորության.

2) մինչև Շենքերի նոր համակարգերի սեփականության իրավունքով անհատույց հանձնումը Հայաստանի Հանրապետությանը սահմանազատման կետ է համարվում Մատակարարի ջրամատակարարման և ջրահեռացման համակարգին միացման կետը, իսկ Շենքերի նոր համակարգերի շահագործումը և սպասարկումն իրականացվում է Կազմակերպության կողմից.

3) Շենքերի բնակարաններում և տարածքներում այլ անձանց կողմից Հայաստանի Հանրապետության օրենսդրությամբ սահմանված կարգով չափումների

միասնականության ապահովման սահմանված պահանջներին համապատասխանող և ստուգաչափված առևտրային հաշվառքի սարք տեղակայված լինելու դեպքում Մատակարարը համարակալված հոլոգրաֆիկ կնիքով կնքում է այն, որը կարող է լրացուցիչ կնքել նաև բաժանորդը:

2. Սույն որոշումն ուժի մեջ է մտնում Մատակարարին, Կազմակերպությանը և Համատիրություններին օրենքով սահմանված կարգով իրազեկելու օրվան հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀ՝**

Գ. ԲԱՂՐԱՄՅԱՆ

ք. Երևան
-- --ի 20--թ.